



PREZIDÉNSIA
KONSELLU
MINISTRUS
VIII GOVERNUN KONSSTITUSIONÁL



Gabinete
Ministru

DISKURSU HODI LOKE SEMANA AKADÉMIKA INSTITUTU
DEFEZA NASIONÁL NIAN (IDN)

MINISTRU ESTADU
PREZIDÉNSIA KONSELHU MINISTRUS,
AGIO PEREIRA

**“Loron ba Estratéjia - Instabilidade Política no Surpreza Estratéjika no
Omenajén ba Líder Rezisténsia Nasionál Kay Rala Xanana Gusmão iha
Kwadru Komemorativu Loron Veteranu sira nian”**

Loron 4, Fulan-Marsu, Tinan 2019

Salaun São José, Katedral, Dili, Timor-Leste



Palácio do Governo,
Avenida Presidente Nicolau Lobato,
Dili, Timor-Leste



PREZIDÊNCIA KONSELLU MINISTRUS

VIII GOVERNUN KONSSTITUSIONÁL



Gabinete
Ministru

Eselénsia sira

Señór no señora sira

Tabé alunu sira,

Ba dahuluk no lori Sua Eselésia Primeiru-Ministru nia naran, ha'u hakarak agradese ba konvite hodi mai partisipa iha konferénsia ida-ne'e. Primeiru-Ministru labele mai partisipa tan ne'e maka husu ha'u atu reprezenta hela nia hodi hato'o votu susesu ba selebrasaun semana akadémika ba Institutu Defeza Nasionál.

Nune'e, ha'u hahú ho kongratula alunu hotu-hotu hosi Institutu Defeza Nasionál, ba sira ne'ebé hahú iha anu letivu 2019/2020, nomós ba alunu sira ne'ebé ramata ona sira nia kursu iha anu letivu 2018/2019. Timor – Leste nasaun foun ne'ebé presiza tebetebes joven sira nia partisipasaun no kuadru sira ne'ebé kualifikadu iha prosesu konstrusaun no konsolidasaun nasaun.

IDN nunka laran-rua bainhira kontribui hodi valoriza no forma kuadru sira hosi Forsa Armada no Servisu Seguransa, nomós ba kuadru sira no tékniku superior sira hosi administrasaun públika, órgaun governamental sira no hosi sosiedade sivil.

Ha'u mós hakarak atu realsa kona-ba buat mesak di'ak sá maka Institutu ida-ne'e desenvolve ona, iha tinan badak nia laran, aleinde fó oportunidade kona-ba ensinu no investigasaun, mai daudauk no nafatin estabeselese ponte no parseria estratéjika ho organizaun no universidade estranjeiru sira seluk hodi, nune'e, hatuur Timor-Leste besik ba sentru badaen-matenek oinseluk no haburas kultura koperasaun akadémika ne'ebé importante tebetebes ba desenvolvimentu nasional.

IDN adapta di'ak no efetivu tebes ho projetu ne'ebé ita hakarak ba ita-nia rai no buka atu hakat dookliu tan liuhosi halo inovasaun, profisionalizmu no kualidade hodi, ikusmai, bele forma loloos" ajente mudansa sira" ba ita-nia rai.

Nia ezenplu maka iniciativa ne'ebé halo hodi ohin ita hotu bele halibur iha "Loron Estratéjia", ho sesaun sira ne'ebé permiti atu debate kona-ba pasadu no prezente, nuudar fiu kondutór importante sira hodi halo konstrusaun estratéjika ba futuru ida estável, desenvolidu no sustentável.



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete
Ministru

Tan ne'e maka, ha'u orgullu ho prezensa hosi ilustre orador sira, nasional no internasional, iha sesaun sira ne'e no, liuliu, ba sira ne'ebé mai hosi dook, lori Governu Timor-Leste nia naran ha'u agradese ita-boot sira nia prezensa no disponibilidade atu hamanas nafatin asuntu bainhira ko'alia kona-ba Timor!

Ha'u hanoin ita hotu hanoin hanesan karik, bainhira dehan katak Timor-Leste hamosu beibeik oportunidade no, klaru, hasoru mós dezafiu barak. Oportunidade tanba hatene oinsá kapitaliza ninia esperiênsia no kapitál rejiaun, tanba haree tuir jeografia ita tama iha Sudeste Aziátiku, rejiaun ida ne'ebé potensial tebetebes iha inovasaun no komérsiu no, ida-ne'e importante duni ba seguransa rejiaun nian. No dezafiu, tanba ita tenke investe loloos duni iha rekursu umanu no dezvoltimentu infraestrutura hodi ita bele kompete ho ita-nia viziñu sira iha rejiaun, hodi harii daudauk oportunidade ba merkadu ne'ebé bele dada investimentu no negósiu be importante tebes hodi ita diversifika ita-nia ekonomia.

Dezafiu no oportunidade seluktan ne'ebé ita-nia nasaun joven hasoru hela maibé, maske joven liu, konsidera nuudar nasaun demokrátiku liu iha rejiaun ne'e. Ida fali maka Timor-Leste nuudar nasaun ne'ebé ho pasadu mosu beibeik konfliktu maibé, kontinua hatudu nafatin katak Timor rai ida hakmatek no ho poténsia boot hodi loke-an ba dezvoltimentu. Ita-nia prosesu polítiku kompleksu duni tan sura hosi esperiênsia ne'ebé lori ita-nia luta tinan 24 nia laran ba libertasaun nasional maibé, ida-ne'e la taka-dalan atu ita bele implementa sistema demokrátiku ida ne'ebé la'o daudauk ba dalan ida seguru no hakat-tuir dalan konsolidasaun nian.

Nune'e, laho haree ba sirkustánsia política foun ne'ebé mosu no hanoin loloos no di'ak hosi partidu polítiku sira, saudável iha kontestu demokrátiku, eziste, buat ida ne'ebé importante maka, partidu sira ho hanoin ida de'it ba dezvoltimentu inkluzivu timoroan sira nian no ba relasaun ida konstrutivu entre órgaun soberania sira, nuudar kondisaun dahuluk atu asegura institusaun sira Estadu nian no dezvoltimentu ekonómiku no, la halo nune'e karik, ita sei labele buras hanesan nasaun. Ne'e dehan katak demokrasia no kiak la bele la'o hamutuk!

Ida fali maka, oportunidade foun mosu mai ita-nia nasaun ho assinatura tratadu, halo ona tinan ida, entre Timor-Leste no Austrália kona-ba fronteira marítima permanente ida-idak nian iha Tasi Timor.

To'o loron ne'ebé asina tratadu ne'e, bele celebra de'it akordu provizóriu ho fahe ba-malu rekursu sira, hodi desblokea direitu atu hetan asesu ba riku-soin tasi nian iha Tasi Timor no, tuirmai, hetan reseita importante seluk atu harii filafali nasaun. Timor-Leste no Austrália nia direitu no responsabilidade, bainhira koalia kona-ba rekursu no atividade sira ne'ebé halo iha ita-nia território soberanu rasik,



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete
Ministru

daudauk ne'e sei defini hela nune'e, loke tan dalan ba oportunidade foun atu halo investimentu no hodi dezenvolve nasaun ne'e.

Barakliu hosi vitória foun ne'ebé ita hetan, ita hotu deve ba Xefe Ekipa Negosiasaun Timor-Leste nian S. Exa. Kay Rala Xanana Gusmão, ne'ebé daudauk ne'e hanesan mós iha ulukba, nia sempre fiar ba kapasidade no konsisténsia povu Timor nian atu luta ba ninia direitu, nia nunca deziste atu kaer soberania ne'ebé nia hakarak no liberdade tomak atu lori nasaun ne'e ba susesu.

Eselénsia sira

Señór no señora sira,

Horiseik ita komemora tiha ona Loron Nasionál veteranu sira nian, hanesan loron ida ne'ebé nuudar símbolu boot tebes mai ita-nia nasaun, tan iha loron ne'e ita fó omenajén ba ita-nia eroi nasional sira. Tinan ida-ne'e, iha fulan agostu, ita sei celebra 20º Aniversáriu Konsulta Populár ne'ebé lori ona mai ita independénsia nasional liuhosi votu maoria populasan hili ukun rasik-an.

Nune'e duni, ita fó ita-nia omenajén justu ba Líder Rezisténsia Nasionál, Kay Rala Xanana Gusmão, ema boot ida iha ita-nia Istória!

Maske Líder istóriu seluk mós nia papel importante tebes iha prosesu ne'ebé lori vitória ba povu Timor, sira balun prezente iha-ne'e, se la'ós mudansa estratéjia nasional ne'ebé Aman Nasaun ne'e hatudu iha Rezisténsia, dalaruma ita-nia destinun oin seluk fali karik, bele mós ita lakon boot liután.

Hanesan imi hotu hatene, Xanana Gusmão sai nuudar Líder másimu iha ita-nia "Luta" iha Konferénsia loron-1 to'o loron-8 fulan marsu tinan 1981, iha Aitana. Hahú hosi ne'ebá, diverjénsia ideia, prioridade sira, sentidu misaun no, ida bootliu maka, asaun ne'ebé konsentradu hamutuk no estratéjiku, hodi tisi-hamutuk iha konseitu Unidade Nasionál no, ikusmai lori ita nia liberdade; liberdade ba Povo Timoroan.

Xanana Gusmão analiza tiha ona konjuntura nasional, rejional no mundial. Nia estuda tiha esperiénsia no téknika guerilla seluk hodi reflète iha objetivu sira luta rezisténsia, kondisaun sira - ema nian, material no militar sira – no reorganiza rezisténsia, hodi halibur povu iha mehi ida de'it ba ukun rasik-an. Ho konsisténsia no korajen nia konsege inspira povu ida ne'ebé sofre no laran-taridu no oinsá nia konsege



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA
KONSELLU
MINISTRUS
VIII GOVERNUN KONSSTITUSIONÁL



Gabinete
Ministru

hetan respeitu hosi guerilleiru sira, tan tinan barak nia laran terus, dalaruma tenke uza medida sira ne'ebé forte maibé, importante duni, atu hamanas nafatin espíritu "Luta".

Despartidarizasaun FALINTIL sira, rekonsiliaun nasionál ho inimigu komun, dinamizasaun joven no desizaun seluktan hosi ita-nia líder nasionál, inklui bainhira ema kaptura nia no, ikusmai, akantonamentu krítiku ita-nia gurillieru sira nian bainhira prepara-an atu ba fó votu popular, maka kondisaun importante sira ne'ebé halo hodi realiza konsulta popular ho hakruuk ba Diretu Internasionál.

Señór no señora sira,

Xanana Gusmão ema ida estrordináriu no karismátiku tebes ne'ebé hahilas-an ho espíritu no kapasidade sakrifísiu, disiplina, servisu no lideransa, nuudar karaterístika própria ema ne'ebé iha kbiit duni atu transforma mundu.

Xanana Gusmão ema ida estratéjiku no ema ida mehidór. No Mehi maka komanda moris!

Obrigadu barak.



Palácio do Governo,
Avenida Presidente Nicolau Lobato,
Dili, Timor-Leste